

Uunga siunnersuut:

Umiarsuarnik isumannaatsumik avatangiisinullu ajoqutaanngitsumik agguisarneq pillugu Namminersorlutik Oqartussat nalunaarutaat

Avatangiisit innarlitsaaliorneqarnissaannik Inatsisartut inatsisaanni nr. 9-mi, 22. November 2011-meersumi § 10, imm. 1, nr. 20, § 10, imm. 2, § 14 aamma § 66, imm. 3, aamma imaani avatangiisit illersorneqarnissaat pillugu Inatsisartut inatsisaanni nr. 15-imi, Inatsisartut inatsisaatigut nr. 5-kkut, 27. november 2018-imeersukkut allannguuteqartinneqartumi § 35, imm. 1, § 49, imm. 1, kiisalu §§ 60 aamma 63 naapertorlugit aalajangersarneqarpoq:

Atuuffia taaguutillu

§ 1. Nalunaarut manna nunatamut imartamullu atuutsinneqarpoq.

Imm. 2. Nalunaarut umiarsuarnut umiarsuarnillu agguivinnut atuutsinneqarpoq.

Imm. 3. Nalunaarut sorsuutitut umiarsuarnulluunniit allanut, naalagaaffimmit pigineqartunut atorneqartunulluunniit, aammalu naalagaaffimmi niuernermik tunngaveqarani atorneqartunut atuutinnngilaq. Umiarsuilli taamaattut sapinngisamik nalunaarummi aalajangersakkanik malinninnissartik anguniagarissavaat.

Imm. 4. Nalunaarut umiarsuarnut 500 BT-t inorlugit angissusilinnut, imaluunniit umiarsuarnut atuunnertik tamakkerlugu taamaallaat Kalaallit Nunaata imartaani angalasimasunut atuutinnngilaq.

§ 2. Nalunaarummi matumani uku imatut paasineqassapput:

1) BT: Bruttotonnage, nunani tamalaani isumaqatigiissummi 1969-imeersumi umiarsuit angissusiinik uuttuisarneq pillugu ilanngussaq 1-imi angissutsinik uuttuisarnermut maleruagassat, imaluunniit tamatuma kingorna isumaqatigiissutaasimasinnaasut naapertorlugit naatsorsorneqartoq.

2) Hong Kong-imi isumaqatigiissut: umiarsuarnik isumannaatsumik avatangiisinullu ajoqutaanngitsumik agguisarneq pillugu Hong Kong-imi isumaqatigiissut, tassungalu ilanngussat, nalunaarummut matumunnga ilanngussami issuarneqartut.

3) Umiarsuaq: Angallat imarsiutaasoq suussusia apeqqutaatinnagu, immami avatangiisini sullissisuusoq sullissisuusimasorluunniit, tassungalu angallatit aqqartartut, atortut puttasut, sulliviit puttasut, sulliviit imminnut kivissinnaasut, atortut puttasut toqqorterinissamut atortullit (FSU-t) aamma tunisassiorfiit puttasut toqqorterinissamut umiarsuakkullu nassiussinissamut atortulersukkat (FPSO-t) ilanngullugit, taakkununngalu angallatit atortuiarneqarsimasut kalinneqartulluunniit ilanngullugit.

4) Umiarsuarnik agguisarneq: Umiarsuarnik umiarsuarnik agguivimmi tamakkiisumik ilaannaasumilluunniit agguineq, taakkununngalu ilanngullugit suliat attuumassutillit, soorlu

umiarsuarnik agguivimmi pineqartumi umiarsuup ilaanik atortuinillu toqqorterineq suliaqarnerlu, kisiannili piareersaaneq imaluunniit agguikkaniit eqqaavinnut immikkut ittunut eqqaaneq ilaatinneqanngillat.

5) Umiarsuarnik agguivik: Sumiiffik aalajangigaq, soorlu inissisimaffik, amutsivik atortorluunniit, umiarsuarnik agguinermut atorineqartoq.

Umiarsuarnik agguisarneq

§ 3. Umiarsuarnik 500 BT-t sinnerlugit angissusilinnik atuisoqaqqusaanngilaq, taamaattorli tak. imm. 2.

Imm. 2. Avatangiisinut Naalakkersuisoq umiarsuarnik 500 BT-t sinnerlugit angissusilinnik agguinissamut immikkut ittumik akuersissuteqarsinnaavoq.

Imm. 3. Imm. 2 naapertorlugu immikkut akuersissut tamanut atuuttussanngorlugu imaluunniit umiarsuarnik aalajangersimasumik agguinissamut atuuttussanngorlugu nalunaarutigineqarsinnaavoq, tassanilu agguinerup umiarsuarnik agguinissamut piumasaqaatit, Hong Kong-imi isumaqatigiisummi allassimasut malinneqarnissaat piumasarineqarpoq. Immikkut ittumik akuersissut piumasaqaatinik, Hong Kong-imi isumaqatigiisutit malinneqarnissaata qulakkeernissaanut pisariaqartinneqartunik imaqassaaq.

Imm. 4. Imm. 2 naapertorlugu immikkut ittumik akuersissuteqartoqarnerani, qinnuteqartup sullivimmi avatangiisinut inatsimmik atuuttumik malinninnissamut pisussaaffiik kalluaassanngilaq.

Imm. 5. Avatangiisinut Naalakkersuisoq qinnuteqartup qinnuteqaammik suliaqarnermut atatillugu aningaasartuutitut naammaginartumik annertussusilinnut tamanut matussusiinissaanut piumasaqarsinnaavoq.

Umiarsuarnik misissuisarnerit akuersissutinillu tunniussisarnerit

§ 4. Umiarsuit nalunaarummi matumani ilaatinneqartut Hong Kong-imi isumaqatigiisummi piumasaqaatit naapertorlugu misissorneqarsimasussaapput akuersissutinillu tunineqarsimasussaallutik, tassungalu umiarsuup avatangiisinik isumannaatsumik ajoqutaanngitsumillu aggorneqarnissaa qulakkeerniarlugu isumaqatigiisummut ilanngussami piumasaqaatit ilaatinneqarput.

Imm. 2. Misissuineq akuersissutinillu tunniussisarneq Kalaallit Nunaanni suliarineqartanngillat, taamaattorli tak. imm. 3 aamma 4.

Imm. 3. Tamanna pisariaqartinneqarpiartoq uppersararneqarsinnaappat, umiarsuit Kalaallit Nunaanni angerlarsimaffeqartut misissorneqarnissaannik imaluunniit akuersissutinik tunineqarnissaannik Avatangiisinut Naalakkersuisoq aalajangiisinnaavoq. Misissuinermit imaluunniit akuersissutinik tunniussinermi oqartussaasut attuumassuteqartut naammaginartumik

akuutinneqassapput, taakkunungalugu sullivimmi avatangiisit, avatangiisinik innarlitsaaliuineq imarsiornerlu pillugit danskit oqartussaasui ilaatinneqarput.

Imm. 4. Avatangiisinut Naalakkersuisoq akitsuutinik, misissuinerup akuersissutinilluunniit tunniussinerup suliarineqarneranut atatillugu aningaasartuutitut tamanut matussutissanik akiliisitsissaaq.

Misissuineq

§ 5. Nunartami avatangiisit innarlitsaaliorneqarnissaannik Inatsisartut inatsisaanni kapitali 12 naapertorlugu nalunaarummi matumani maleruagassat malinneqarnerinik nakkutilliisoqassaaq.

Imm. 2. Imartami imaani avatangiisit illersorneqarnissaat pillugu Inatsisartut inatsisaanni kapitali 19 naapertorlugu nalunaarummi matumani maleruagassat malinneqarnerinik nakkutilliisoqassaaq.

Pineqaatissiisarnerit

§ 6. § 3, imm. 1 unioqqutillugu umiarsuarnik agguisoq, § 3, imm. 2 naapertorlugu immikkut ittumik akuersissutini piumasaqaatinik unioqqutitsisoq, § 4-mi piumasarineqartutut umiarsuarmik misissorneqanngitsumik imaluunniit akuersissummik tunineqanngitsumik suliaqartoq, imaluunniit § 5 naapertorlugu misissuinissamik itigartitsisoq pillaaammik akiliisussanngortinneqarluni pineqaatissinneqarsinnaavoq.

Imm. 2. Pinerluttulerinermut inatsimmi kapitali 5-imi maleruagassat naapertorlugit ingerlatseqatigiiffiit pinerluttulerinermut inatsisit malillugit akisussaatinneqarsinnaapput.

Imm. 3. Pillaammik akiligassiissutaasut Nunatta Karsianut tutsinneqassapput.

Atuutilerfia

§ 7. Nalunaarut manna [indsæt datoen for Konventionens ikrafttræden]-imi atuutilerpoq.

Namminersorlutik Oqartussat, ulloq xx. xx. 2023

Kalistat Lund

Nunalerinermut, Imminut Pilersornermut, Nukissiutitut Avatangiisinullu Naalakkersuisoq

/ Natuk Lund Olsen

[INDSÆT KONVENTIONEN SOM BILAG]